




臣朱壽朋敬編

臣張毓英恭校

光緒十年甲申春正月丙子朔元旦節寅刻詣 奉先殿行禮辰刻詣 慈寧宮行禮御中和殿受禮太和殿受賀已刻詣 大高殿 壽皇殿行禮○己卯以孫毓汶兼署刑部尙書許應騷兼署兵部左侍郎

○左宗棠奏承准軍機大臣字寄光緒九年六月初八日奉 上諭翰林院侍讀惲彥彬奏江浙墾荒客民與土民仇怨日深請飭力求清釐之法一摺等因欽此當經恭錄轉行欽遵查辦去後茲據各屬先後稟覆又經批司彙辦在案茲據江甯布政使梁肇煌蘇州布政使譚鈞培會查得江甯府屬上元江甯溧水六合等縣自遭粵逆竄陷被兵十餘載蹂躪殆徧村落成墟肅清後一片荒土農民存者無幾不得不招募客佃開墾曾於同治八年籌議招墾章程詳奏明遵辦歷久均屬相安內溧水縣上年冬間雖有楚民強墾荒田與土民爭控業經訊明押令回籍其徐州府屬銅山沛縣二縣湖淤園地從前東省災民攜眷來徐領種水涸湖田按年完租充餉現已漸成土著並無強作情事此外淮揚等屬現在查無外省客民住境墾荒至蘇松等屬除全熟之華亭奉賢上海寶山崇明南匯川沙靖江等八廳縣田地並無拋

荒長洲元和吳縣常熟昭文吳江震澤太湖婁縣青浦太倉嘉定金匱江陰丹徒等十五州廳縣間有荒蕪田地均由土著農民陸續開墾無須借力客佃外祇崑山新陽金山陽湖無錫宜興荆溪丹陽金壇溧陽鎮洋十一縣開墾客民大都江浙及江北人居多承種有年久已編入戶口細冊專心農務亦無強作爭執之事惟常州府屬之武進縣先因楚民初到開墾其時本地人少耕作及至楚民漸多聲勢漸橫每屆收租類多抗欠甚有收穫後飽載遠颺遂使業戶賠累錢漕以致土客相爭現經該處紳士另行妥議禁約章程稟請參酌核辦以期益臻周妥等情轉詳請奏前來臣等覆核無異仍飭現有客民墾荒各屬隨時認真稽查設遇土客爭訟務須持平定斷毋任忿爭滋事報聞○庚辰諭倪文蔚奏廣西臬司國英自兼理藩司篆務頗形竭蹶入秋以來精神恍惚公事耽延時復外謬等語調任浙江按察使國英著開缺來京另候簡用○辛巳以孫翼謀爲浙江按察使○甲申上詣太廟行禮○乙酉上御紫光閣賜廷臣筵宴○時享太廟遣隆懋恭代行禮○諭給事中鄭溥元奏參編修尹琳基貪鄙苛刻縱酒滋事各節一摺著翰林院掌院學士查明據實覆奏○諭給事中鄭溥元奏近科磨勘試卷未盡允協請飭議章程等語科場磨勘功令綦嚴自應秉公辦理嗣後派出磨勘各員於應簽不應簽之處務當悉心酌核不得稍涉偏徇如有挾嫌報復情弊著覆勘大臣據實參奏以昭公允○丁亥諭左宗棠奏假期屆滿

病尙未痊仍懇開缺一摺左宗棠宣力疆圉勞勩懋著朝廷深資倚任屢次陳請開缺均經賞假調理茲復迭據奏稱目疾增劇氣血漸衰非靜心調攝斷難見效情詞懇摯不得不勉如所請左宗棠著准其開缺賞假四箇月回籍安心調理兩江總督著裕祿署理兼署辦理通商事務大臣左宗棠著俟裕祿到任後再行交卸起程安徽巡撫著盧士杰暫行護理○戊子諭軍機大臣等徐延旭奏布置北甯各路防軍嚴加扼守各摺片覽奏均悉北甯各路要隘經徐延旭飭黃桂蘭等分別布置該撫務當督飭各營備禦完固毋稍疏虞岑毓英計早到防兵力較厚卽著會商徐延旭分飭滇粵各軍疏通道路迅速進兵以期互相援應彼族狡謀叵測時時窺伺北甯尤宜穩慎扼紮毋爲所乘並激勵劉永福一軍趕緊整頓規復山西至方長華一軍著張樹聲催令迅卽到防欽州一帶路僻難行據奏請飭廣東官軍由欽靈進攻海陽是否可行仍著張樹聲酌度辦理將此由五百里各密諭知之○己丑諭軍機大臣等岑毓英奏請再撥云者士得十三響十七響鎗自來火子二百萬顆士乃得鎗自來火子一百萬顆迅速購解濟用其銀由蘇滬應解演餉扣抵○庚寅 上詣 大高殿 壽皇殿行禮升保和殿賜蒙古王公筵宴○祭 社稷壇遣本格恭代行禮○辛卯 諭軍機大臣等岑毓英徐延旭先後奏陳調撥輪船由水路進擊現在廣東福建防務喫緊且無大號得力兵輪無可徵調前據徐延旭奏請飭廣東由欽靈進規海陽仍著

張樹聲遵照前有酌度辦理等會奏酌度方長華一軍已由南甯迅赴關外礙難由欽靈前進報聞○頒給江蘇青浦縣城隍廟匾額○壬辰諭前據都察院奏江蘇職員王爾珏等以江陰縣勒充甲長呈請禁革並黏附八條干預地方漕務等情當降旨令江蘇巡撫訊明具奏茲據衛榮光奏江陰縣催納錢漕並不責令甲長經管亦無勒充甲長責令賠墊情事王爾珏京控各節及所陳八條現均委詢明確或得自傳聞或查無實據該職員跡近要挾審明定擬等語此案職員王爾珏京控各節雖非假公濟私惟事不干己輒私黏條款率請優給書差令該縣設法彌縫錢漕跡近要挾實屬荒謬王爾珏著革去運同銜教習舉人以示懲儆嗣後江陰縣徵收錢漕卽將甲長名目永遠禁革飭令該員勒石遵守並勸辦義圖將錢漕立限清完毋許差保人等催迫並嚴禁藉端苛派以免擾累而杜流弊餘著照所議辦理○李鴻章奏中法相持迄無定局越南山西之戰滇軍與劉永福所部憑城固守殺傷相當卒致退舍非鏖戰之不力實器械之未精西人製造後膛鎗礮日新月異其速率之猛準頭之遠幾於無堅不摧天地肅殺之氣與人世機巧之心相尋無已而彼得以其時出奇角勝我仍因陋就簡拙於制機捷兵之常談而不思變計得失利鈍之懸殊不符煩言而決矣臣忝領北洋無日不以選械詰戎爲事每與西將及出使諸臣周諮博訪一名一物必參攷衆說而切究之積有歲月竊識端倪蓋簡器於數萬里重洋之外非熟悉其

名目之新舊機括之堅韌則所得皆他人唾餘徒糜費而無濟於實用近年購置新式後膛鎗礮皆令駐德大臣李鳳苞及德商斯米德訂造頗能精堅適用天津淮練各營均一律更換仿照西法操練步伍取準精益求精而滬粵閩浙防軍既少命中致遠之器卽如何操法如何用法似亦未甚請求去冬因桂軍器械缺乏曾由臣營勻撥後膛鎗礮運往粵東以資關外應用惟沿邊沿海處處設防斷非北洋一隅之力所能長此接濟總理衙門與臣函商以爲多增無益之事不如多置有用之器屬與洋商定期訂購以備演粵閩浙等省要需所需價值卽於出使經費項下暫行挪付將來何處需用鎗礮卽由何處撥價撥還誠爲通變權宜之至計臣卽督飭軍械委員與斯米德酌訂合同分投德美奧各廠定購克鹿卜後膛過山鋼礮一百二尊哈乞開司六響後膛快鎗五千桿毛瑟後膛步鎗五千桿應配子彈佩帶架具零件俱全分別限期運解來津約共價銀四十餘萬兩隨飭江海關道於出使經費項下分起借付查過山礮於南方行戰最宜哈乞開司毛瑟等鎗爲德美各國著名精器俟購運將到臣卽咨商演粵閩浙各督撫臣先定分撥之數並令按照原價籌款領器以清借項仍俟還款有著再行訂購則要款既不至虛懸而利器亦陸續增備洵屬一舉兩得惟後膛鎗礮機件靈巧操法尤極精詳各省得此有用之器果能嚴督將士細心練習於以折衝制勝庶幾稍有把握耳得旨該衙門知道○癸巳諭軍機大臣等方長華

一軍可否由欽靈一帶前進著彭玉麟張樹聲酌地勢徑令迅速到防毋得遲延○諭內閣學士周德潤奏勳臣不宜引退請旨責以大義令其在任調理等語左宗棠勳勞懋著朝廷倚任方殷當此時局艱難尤賴二三勳舊之臣竭誠幹濟豈肯任其功成身退遂賦歸田祇因該大學士目疾增劇而兩江地大物博政務殷繁又難靜心調攝是以降旨准開總督之缺仍賞假四個月回籍原欲其安心調理俾得早日就痊出膺重寄該大學士素著公忠不至稍耽安逸著即趕緊調治一俟稍愈不必拘定日期即日銷假以副委任○諭給事中鄧承修奏給事中鄭溥元參奏編修尹琳基貢鄙苛刻縱酒滋事等情挾私逞忿撫拾揣摩恐開攻訐之漸等語著都察院堂官按照例承修所奏各節查明具奏○甲午 上幸西廠子聞煙火○岑毓英奏於光緒九年十一月二十五日曾將帶兵出省日期恭摺奏報拜摺後即行起程於十二月初一日行次通海縣接准臣炯咨會知越南山西省城已於十一月十七夜失守一切情形業經兩次奏明在案臣毓英聞警之下當即兼程前進於十二月初九日在蒙自縣途次承准軍機大臣密寄十一月十六日奉 上諭倪文蔚奏近日邊情並前敵各軍籌備情形徐延旭奏遵 旨出關日期現飭分別進規嚴防各一摺覽奏均悉法人於山西之丹鳳北甯之嘉林設險嚴備情形與從前不同在防官軍必須嚴慎進駐嚴密布置不可稍形輕忽著岑毓英倪文蔚徐延旭唐炯督飭各營妥籌調度

劉永福添募勇營漸次到齊惟係新集之軍能否得力越南義兵恐不可恃法人此番極意經營若任其侵偪則邊事益棘所關於大局者甚重務當飭令劉永福等妥慎進取盡力抵禦勿稍退縮河內設守已嚴猝難攻拔應如何避堅攻瑕誘敵制勝並宜相機妥籌徐延旭現已出關岑毓英接奉前旨諒已部署起程當此事機緊要該督撫尤宜和衷共濟隨時悉心會商妥籌方略以副委任斷不可稍存意見致誤機宜將此由六百里各密諭知之欽此仰見 聖主明見萬里欽服莫名伏查山西地當衝要廣出米糧

屯兵此地可以聯絡北甯粵軍相機進取惟山西城逼近江邊輪船礮彈可及城中防守頗不容易臣所

以急欲親往駐紮保此要區乃於十一月十九日奉 旨允准該處城池已先於是月十七日失守實屬

變生意外此城既失越事愈加棘手法人可由興化宣光分道犯滇且興化城緊在江邊形勢較山西尤

爲難守宣光無兵駐守更屬堪虞必須面面兼顧而由蒙自至興化陸路一千六百餘里由開化至宣光

陸路一千二百餘里卽由蠻耗至保勝亦有四百餘里皆偏僻小道路極崎嶇沿途人煙稀少猛獸甚多

軍士裹帶行糧披荆斬棘跋涉維艱自蠻耗至保勝雖水路可通僅有小船二三十隻可裝兵三四百人

往返一次必需十數日若由保勝水路至興化往返必需二十餘日欲速不能臣焦灼萬分再三籌畫只

有水陸並進爰派記名提督吳永安統帶二營馳往開化督同前派分道出關之副將陳安邦等三營共

合六營由河陽馳赴宣光擇要駐防其餘總兵馬柱雷應山等各營由蒙自陸續進發臣帶親兵小隊駕輕舟先行前進於十二月十一日馳抵保勝與臣炯面商分布意見相同現據記名總兵丁槐參將張永清等稟報已於興化城外扼紮防堵主事唐景崧所帶粵勇兩營自山西退至興化已於十二月初四日繞道撤回北甯南將劉永福仍紮興化惟大礮全行失落各項小鎗亦多遺失興化上游之清波夏和等縣教民紛紛變亂文報幾至阻塞臣等現切屬總兵丁槐等多方預備嚴密防守又派知縣李豔枝等二營往清波夏和駐紮安民並分給劉永福快鎗子藥俾資整頓令其嚴束所部恪遵紀律又行文南官革除苛政收拾民心俟總兵馬柱等各營到時臣毓英卽親往興化一帶查勘布置一有就緒卽由興化旁出宣光督飭提督吳永安等相機前進並與廣西撫臣徐延旭聯絡會商和衷共濟仰副 聖諭諄諄誥誠之至意其保勝興化一路滇軍與劉團共事須得兩軍信服之員駐紮調和臣炯擬將臣毓英胞弟二品頂戴分省補用道岑毓賢調來協同照料聞此番法人糾數國之兵以全力經營又加越南各處從教匪黨已有一萬數千人船多礮利勢頗猖獗滇軍既無輪船又少大礮輓運更難必須廣東福建水師有兵輪船攻擊越南海防以分賊勢廣西雲南兩省增兵添餉通力合作水戰陸戰各盡其長方可迅圖恢復而廣東福建各有應守海口不識兵輪能否分撥臣等不敢妄擬應如何辦理出自 聖裁臣炯前奉

之至意報聞○是月比利時國使臣諾丹福回國參贊米師麗署理

二月丙午朔祭

先師孔子廟遣李鴻藻行禮○諭上年順天直隸各屬被水災區節經降旨蠲緩糧租

撥發銀米並由該署督等廣籌款項分別賑撫俾資接濟惟念順天所屬之通州等十餘州縣直隸所屬之天津等二十餘州縣被災較重積水未消閭閻困苦異常朝廷實深慮系亟應特施膏澤加惠災黎著撥江蘇浙江本年漕米各五萬石即在天津就近截留由李鴻章等詳查災區輕重及時分撥散放並以工代賑核實經理其隨漕輕齋等項銀兩經制耗食米石並飭解交直隸津貼賑需該署督等務當督飭所屬認真撫卹毋任官吏稍有弊混用副軫念民艱至意○丁未祭社稷壇遣載敦恭代行禮○轉裕

德爲翰林院侍讀學士霍穆歡爲翰林院侍講學士○左宗棠奏

臣於光緒九年十二月三十日接准軍

機大臣字寄十二月二十二日奉

上諭徐卮奏請陳導淮辦法以弭江皖水災繪圖呈覽一摺據稱江

皖兩省水患頻仍亟須挑泗沂爲導淮先路仍照從前抽溝之法循序疏治並由大通口引河入海洩水

較易等語著左宗棠楊昌濬照所奏各節悉心會商妥籌辦理等因欽此查復准一案臣宗棠於上年會

經奏明指撥專款並委署淮揚海道徐文達徐州道程國熙勘明稟覆批令候臣等親履覆勘再行商辦

正在料理啟程欽遵前因臣宗棠卽於正月初五日出省十二日行抵清江咨會臣昌濬及徐文達程國

熙並臣宗堯所帶熟悉水利各員先將湖水出入之張福口河天然引河碎石河吳城七堡順清河等處
周歷閱視再由楊莊循舊黃河沿途查看至雲梯關並由大通口至響水口查勘引河入海道路於二十
日回至清江詳加考究悉心妥籌竊以江北連河北受泗沂之水西受淮水其間可以導引入海之處僅
有一舊黃河本爲淮水東去之故道亦卽今日宣洩泗沂之要區也導淮之議發於前大學士兩江督臣
曾國藩同治六年七月間因紳士之稟奏明試辦光緒六七等年前著督臣吳元炳前督臣劉坤一踵而
行之而前漕臣張之萬抽挑舊黃河及張福碎石等河實爲導淮權輿治水必先下游黃河不通海則尾
閘壅遏泗沂不入舊黃河則湖水中梗雖欲出清口入運河而不能遑論歸海安徽學政臣徐郅所奏挑
泗沂爲導淮先路洫爲確論與近年所辦大略相同查舊河自同治六年抽挑以後又經擇挑數次漸疏
漸達河底甚寬斷不能挑至老灘又多飛沙陷沙兼有稀淤水小之時易於阻塞同治十三年所挑楊莊
河頭三百餘丈至光緒六年已經淤高數尺惟光緒七年所挑河身適連連年大水冲刷得力自楊莊至
安東佃湖一帶尙屬通暢可以行舟泗沂之水賴以分洩八九兩年非常汎漲猶得從容啟壩以保襄下
河秋成者未始不由於此擬將楊莊以下至湯土四十餘里再行轉寬加深並將安東以下灣洲積淤地
方間段開闢又佃湖營以下至雲梯關一帶河道較窄亦應加闊寬深俾溜勢激蕩刷沙攻淤河身可期

漸通其雲梯關下二百餘里河形高仰且有達年沙灘昔以全黃之力所不能通者今欲以泗沂分流通之其勢良難查大通在雲梯關下十餘里舊黃河北岸係嘉慶年間漫口東北流四十餘里至響水口接連潮河出灌河口入海河形已嫌淺窄就此加挑寬深途捷而工省兩面各有寬灘容易隄防舊河既通出海又便泗沂來源自當大爲分減淮未復而運河亦可少安淮已復而歸海無虞阻滯此挑泗沂以爲導淮先路工之宜先辦者也淮水挾兩省水流匯爲洪澤湖本係江皖巨浸自道光年間爲黃河所淤北高南下形如側釜由禮字河趨高寶湖以入運河者垂三十年已成自然之勢今欲導之復故不啻挽之逆流自張福口引河起至大通響水口入海計程三百五十餘里節節窒礙非由下游暢其去路上游塞其漏卮其不能捨下就高入黃歸海也明甚然事在人爲不惜費不憚勞天下無不辦之事工可漸施而事不可求速水可分洩而勢難以全移查湖邊引渠一如張福口河一如天然引河皆北趨陳家集之大冲至碎石以達吳城七堡又北而至順清河口以接楊莊舊黃河張福口河六十餘丈宜加寬深天然引河僅存形迹更須疏濬而吳城七堡一帶且高張福口河底一丈六七尺地勢彎曲又必大加挑挖以順其勢諸河既修湖水果能入黃然後可堵禮字河以截旁趨之出路堵順清河以杜運河之奪溜此引黃入海工程當以次接辦者也湖水不高不能入黃太高不但圩堰工可慮連日開壩雖支且於肝胎五

河近湖民田有礙擬將堰圩智信林等三處修復堅整以洩湖漲更擬建閘於陳家集下大冲地方俾湖水操縱由人多入淮而少入運但其地沙泥鬆浮植基不易尙須臨時察看情形酌量辦理此又復淮案內預籌以善其後者也臣等詳覽形勢博訪周諮施治之法大抵不外乎此天下無有利無害之水泗沂淮之注於江北寔下河最愚苦之然當插秧之際則又惜水如金每相爭競藉令涓滴悉歸於海害則去矣如灌溉何臣愚以爲疏舊黃河分減泗沂已著微效自當加挑寬深兼疏大通口以暢出海之途復淮事仍分年分段察酌興辦去其太甚之害留其本然之利不急復淮之美名但求減漲之實效江北於皖省爲下游下游利上游自無不利矣前督臣曾國藩原奏內稱復瀆之大利不敢必其遽興淮揚之大患不可不思稍減老成謀國計慮深遠前署督臣吳元炳前督臣劉坤一等奏辦導淮亦皆以循序程功爲主與學臣徐郵所陳臣等所擬均相符合臣宗棠現蒙恩准開缺賞假但此等要工何敢膜視現商定於清江設立復淮局遴派大員駐局提調一面派員估計工程次第舉辦容俟署督臣曾國荃到江告以所勘情形以冀事之必成仰副朝廷軫念東南興修水利之至意報聞○戊申諭長順奏請假回旗葬親一摺長順著賞假六箇月烏魯木齊都統著升泰馳驛前往署理○己酉諭軍機大臣等有人奏條陳奉天事宜各摺片據稱盛京內倉監督於定章津貼各署之外仍送陋規奉省八旗官學事同創始經費

須籌請飭定監督捐款於應交正款外每任每員各交官學銀五千兩內倉差使每屆派送時五部中往往一人把持甚有一人連充四五任者嗣後如連次保送將該堂司照徇私例嚴議等語著徐桐薛允升確切查明酌議具奏其所稱吏治刻儆苛派差徭農商交困亟應認真查辦核實釐定以紓民力著該尚書等將應行裁減之處詳細酌核妥議章程奏明辦理至承德縣班房諸弊查明禁革該知縣朱克揚及刑部主事楊德林被參各節著一併確查據實參奏原摺一件片三件均著鈔給閱看將此各諭令知之○諭都察院奏據工部筆帖式錫齡以伊父楊得承因案涉訟監禁斃命刑部承審司員朦混徇徇等情赴該衙門呈訴案關人命虛實均應澈底根究著刑部堂官確切查明據實具奏○庚戌諭前據給事中劉承修奏廣東高州匪徒竊發由於地方官諱盜養奸並知府鍾秀與知縣王之澍互相稟許各情當諭令該督撫查明具奏茲據張樹聲裕寬奏逐一確查據實覆奏此案高州匪徒莫毓林等糾眾聯盟圍襲郡城並分竄電白縣城當經文武各員拿獲匪首不致蔓延爲患原參地方官貪庸乖謬諱盜養奸各節據張樹聲等嚴密訪查或事出有因或查無實據高州府知府鍾秀於匪徒滋事未能弭患事先且將屬員負氣毆辱殊屬躁妄前署茂名縣知縣候補通判王之澍於查辦會匪重案漫不經心致貽後患實屬庸劣不職鍾秀著交部嚴加議處王之澍著卽行革職前茂名縣知縣姚成熙電白縣知縣鄭履端失察

書吏勒索夫價均著交部議處前署電白縣知縣董汝礪署陽江鎮右營都司鄭廷熊於所屬會匪滋事拿獲首要各犯功過尙足相抵著開復原參摘頂處分仍著該督撫飭屬緝捕餘匪務絕根株以靖地方

○辛亥諭御史文海奏婦女逛廟有傷風化請飭禁止一摺婦女入廟燒香本干例禁若如該御史所奏近來京師各廟仍有婦女遨遊實屬不成事體著步軍統領衙門順天府五城御史出示曉諭嚴行禁止

○癸丑諭翰林院代遞編修王懿榮奏京員津貼銀兩請飭各省妥籌開款更定名目作正開銷一摺著戶部議奏○翰林院代遞編修王懿榮摺稱尙書一經戰兢以來二帝三王之政粲然大備顧自遭罹秦燔重厄斯文漢旣奮興旁求典籍得自濟南伏勝者名曰古文出自孔子宅壁魯孔安國所定者別曰古文終漢之世二者代興並立學官雖其書自先秦以來字形遞變師說各異乖疑難正在所不免然卽漢人所傳熹平中一刻碑石魏正始間再刊爲三體凡此舊文旋並淪失皆由晉永嘉之亂經籍道消當時古文僅存秘本今文漢注傳習無人一遭寇變泯焉漸滅於是今本尙書出焉今本尙書者皆豫章內史梅賾所上於朝唐貞觀中孔穎達爲疏者也篇中所具古文乃刺取秦漢子史各家所稱引者傳曾造作又復依託孔傳真僞淆雜視然成書自宋儒朱熹以來遞生疑議爭詆爲僞古文以迄近世羣相論辨各有專家無須陳列我 高宗純皇帝 欽定四庫全書總目提要刊定羣言辨其真僞昭然發矇萬世師

資一時臣工承流宣化譏著多人繼絕興廢實超往古有前臣山東督糧道孫星衍撰尙書今古文注疏三十卷搜輯前漢今古文及各家古注之僅存者編輯成書類復其舊又徧采前人傳記之涉書義者備疏其下不逞私臆最稱矜慎坊肆刊置所在流行是則網羅散失守闕抱殘所錄古文爲真古文所采古注爲真古注視晉唐以來所行之今本尙書實爲有漢相傳古書之遺文亦卽爲知古稍近之真本就今本區別言之猶兩唐書兩五代史之當分稱新舊不得不以古文之名名之也伏思尙書一書經中之史史中之經二帝三王心法治法畢現於斯不存其真曷用其僞以之比較舊唐書舊五代史得邀天鑒並列學官者所關尤大臣觀後漢陳氏之疏立左氏傳能於真僞錯亂孤學少與之際解釋先聖之積結淘汰學者之累惑南齊陸澄領國子博士時議置諸經學能於南北凌雜微言將絕之時論易之當主鄭文不可獨用王弼左傳宜於服虔之外兼立賈逵杜預伊何人斯尙知體要矧臣今日生逢盛世職在翰林管見雖微敢不上達伏乞 皇太后 皇上俯准臣奏上法 高宗純皇帝以舊唐書舊五代史附入二十四史並行之意 飭下武英殿及今補刊羣書板葉之時行文江蘇學臣徵取其書刊附舊刻十三經之內使與今本尙書注疏並行以存二帝三王遺書逸文之真以見我 皇上法 祖同 天之美擬並請 特旨通飭各省督撫學政各官嗣後凡過大小考試命題至尙書一經准其兩本並用頒爲功

令 上諭翰林院代遞編修王懿榮奏請復古本尙書與今本並行一摺著禮部議奏○甲寅戶部奏各省應解京餉當同治初年道路多阻間由銀號匯兌嗣以各省肅清於同治五年經臣部奏陳請 旨飭令各督撫於部撥銀兩派員親齎交庫不得藉口委解之難率行匯兌嗣經督撫紛紛陳請雖經臣部暫行議准仍令查明如可委解卽不得意存便利復歷經科道條陳嚴禁匯兌均經臣部議令遵行在案乃各省竟視匯兌爲成例致有去歲阜康銀號倒閉庫欸被失之事經臣部於上年十二月奏明請 旨飭令各省關所有應解部庫銀兩各衙門飯銀京員津貼以及各省協餉概令委員親齎不准再行匯兌奉 旨允准行知遵照惟恐各省關積習相沿藉口委解之難仍行匯兌既可巧避處分至於庫欸被失又或互相推諉實屬不成事體查吏部處分則例載直省批解銀兩該管司道府不委現任官解送濫委廢員匪人以致中途失誤者將原委之員降一級調任私罪又載若解官已請防護又係經由大路而餉鞘被失者所失餉鞘地方文員分賠十分之五簽差不慎之大員分賠十分之三管解官分賠十分之二如解官係微末窮員不能賠補仍著落簽差之大員分賠等語是委解餉項處分著賠例定綦嚴各省關匯兌銀兩卽應比照辦理擬請此後各省關應解部庫各項銀兩不照例委員批解率行匯兌致餉銀被失者卽照濫委匪人以致中途失誤例將原委之員降一級調用其被失欸項既無地方官分賠若責令銀